

# SARS E TLO BOKELLA LEKGETHO LA TSWEKERE (SBL) HO TLOHA KA LA 1 MMESA 2018

**PRETORIA, Labohlano, 15 Tshitwe 2017** — Ditshebeletso tsa Lekgetho tsa Afrika Borwa (SARS) di tla bokella Levi ya Dino tse Tswekere (SBL) ho tloha ka la 1 Mmesa 2018.

Levi ena e wela tlasa Bili ya Tokiso ya Dikgahla le Bokaalo ba Tjhelete le Melao ya Lekgetho, ya 2017, jwalokaha e fetisiswe Palamenteng ka la 5 Tshitwe 2017.

Karolo ya 7A ya Sejule ya Nomoro ya 1 ya Molao wa Bolaodi ba Thepa Meeding, wa 1964, e nehelana ka monyetla wa hore ho be le levi e tlang ho phahamisa tsa bophelo bo botle dinong tse tswekere tse entsweng kapa tse romellwang ka hara Afrika Borwa. Dihlahiswa tse tswang kantle ho naha di tla lefiswa lekgetho nakong eo di hlekelwang ho ka sebediswa kwano lapeng mme dihlahiswa tse entsweng hae mona di tla lefiswa lekgetho ho tswa mohloding.

Dikgutliso tsa SBL le ditefo di ka nyehelwa ka tsela ya elektronike ka tshebediso ya SARS eFiling mme di tla boela di amohelwa makaleng a Bolaodi ba Thepa Meeding.

Ho fumanwa ha laesense le ngodiso ya bahlahisi ba dino tse tswekere e tla e qala ka Hlakola 2018. Ke feela bahlahisi ba phaello ba hlahisang dino tse tswekere tse nang le paloyohle ya tswekere ka selemo ka seng e fetang 500 kg ba tla lokela ho fumana laesense le ho lefa SBL. Bahlahisi bao e seng ba phaello ba ka tlase ho pehelo ena ho tla lebellwa hore ba ingodise empa ba keke ba angwa ke SBL.

Levi e tsepamisitswe ho disente tse 2.1 gramo ka nngwe ya tswekere e fetang digramo tse 4 tsa 100ml ka nngwe, mme sena se bolela hore digramo tsa pele tse 4 ha di lefiswe levi. Levi ena ke karolo ya lenaneo la mmuso ho thibela le ho laola mahloko a sa tshwaetsaneng (NCDs) le ho thusa thibelong le taolong ya monono.

SARS e tla ikopanya le bakgathatema bohle ba indasteri ena ka tsela ya dipontsho ho ba tataisa motjheng ona. Matsatsi a dipontsho tsena a tla phatlalatswa websaeteng ka Pherekong 2018. Lesedi le mabapi le SBL le fumaneha websaeteng ya SARS e leng [www.sars.gov.za](http://www.sars.gov.za).